

MATEW JÕ KÀHHÔC

*Pê Joje cute ajpẽn par xà to ajmār hamre
Matew 1.18-25*

¹⁸ Pê Jeju Crixto pým xà hane he. Pê Marijkwýj me Joje ramã ihcunĩ kam, cute me hikwa xà na, me ajpẽn par pejtu. Ne me hikwa xwýjrea na, cormã Marij cunĩ kam, ramã Pahpãm Carõ Pejti kôt ihkra ne ihtic.

¹⁹ Ne Joje pê hũmre pê catyt kam ipa catê, ne hàhcaprĩ, ne hàhcajrěnti, na pê Marij te apu ihpahàm cupate, nee mehcunea kam mare mã, jũm te ahti na kam ihkra na ihkôt harěn kėanre prãm nare. Cwýrjapê ri aracri cute Marij me hikwa tuw na me ajpẽn par xà ata to hamre to prãm.

²⁰ Ne caxwa ata kam, nõr xà kam nõ ne ita to amji kampaa, ne hõt. Mã ipimtir kam, cõjkwa pĩn Pahhiti pê Pahpãm jarkwa na imprar catê nõ hýrmã iwryc ne cumã:

— Hàpà Joje, apê pahhi xwý pê Tawi tàmwxý tàmwxý ita! Nee ca apu amji mã pa nare, ne atýj Marij pê gĩxi ita na amji capa. He nee jũm te kam ihkra nare, ne Pahhiti Carõ Pejti kôt ri ihkra.

²¹ Quê ha cumã ihkra xũmre nõ ihpým, ca ha caa cumã hapry to Jeju. Ne hapry ita kôt harěn xà te “Pahpãm te me hũtār catê”. Ampo na? He quê ha akra ita ihtýj mehkwy kėn catia ata pê me hũtā.

22 Ne ampo na ri gĩxi te hajÿr? Pê ramã Pahpãm jarkwa to ihcakôc catê japrÿ te Ixaj xwÿ ata gĩxi to awjarê, na quê ha hane. Na pê to hũjarên to:

23 “Quê ha jũm cuprÿ ne ihcunĩ kam ihkra, ne cumã ihkra xũmre nõ cato, quê ha cumã haprÿ to Emanew” hane. Ne Emanew ita kôt harên xà te “Pahpãm me pahcotea na ipa” — hajÿr.

Hõhõ, Pahhiti jarkwa to imprar catê te Joje mã hũjarên to hajÿr, ne ma hacpÿ mã cõjkwa wÿr cute amji jaxàr.

24 Mã Joje pimprar, ne cute Pahhiti jarkwa na imprar catê ata jarkwa kam hapac pyrentu. Ne ihtÿj cute Marij pê hĩxi na ahna amji caxàr, ne nee cute me ajpẽn par xà ata to hamre nare.

25 Cakrô, pê nee cormã hĩxi tic ata na ihcaxun nare, pê ahnaa cumã ihkra xũmre pÿm, pê cumã haprÿ to Jeju.

2

Pê mehrã kreti kwÿ Jeju pupun prãnte me cato

Matew 2.1-23

1 Pê Juta jõ pjê kam, Pãw jõ krĩ kam Jeju ihpÿm. Pê caxuawHeroti pê Juta jõ pjê to ihmipej catê. Ne amcro ata kam me hũmre krã kreti te amji jahkre pejti kwÿ ajco me caxêre cunea te amji kamhapac xà to me hahkre to me ipa. Ne cute me pyt japôj xà rũm, Juta jõ pjê kam, Krĩpinkrên

wÿrme caxêti pupun, ne maihkôat pyt cjêj xà wÿr me pra. Ne krĩ mã me cator.

² Ne curia amehkrĩ catêjê cukij ne me cumã:

— Jõ ri mõrmõ jũm krare pê Juta catêjê jõ pahhi ata pÿm? He waite ihmat ri pyt japôj xà rũm, me ijõ pjê pĩn, ite me hõ caxêti pupun, na wa ajpên ite amehkĩn, ne amji mã hũpahti to prãmte hÿrmã me pra — hane.

³ Mã Heroti pê Juta jõ pjê jõ pahhi ata te me hũjarên xà ita par, ne ampeaj kam, jũm te hũhÿr ne haxà kam pahhi na hâr na, cumã hũpa. Mã curia mehkrĩ catêjê cunea mã, pahhi ata te me kam incryc cumã hũpa.

⁴ Mã cute Pahpãm mã mehcajrên catêjê jõ pahhi me, me cumã Mojxe xwÿ te me hapackre xà to hahkre catêjê te me cuprôn, ne pahhi pÿm xà na mehàhcukjêr to:

— Jõ ri quê ha Crixto pê pahhi na Pahpãm te capi ne ihkujahêc itaihpÿm? — hajÿr.

⁵ Mã cute me cumã harên to:

— Ita ri Juta jõ pjê kam, Pãw jõ krĩ kam ri ihpÿm xà. Ampo na? Hepê ramã Pahpãm jarkwa to mehcajê catêjê Pahpãm jõ kàhhôc kamita na mehhôc to me hane he:

⁶ “Pãw jõ krĩ, acrire cakrô,
krĩ cuneajirôa pê acati.

Ampo na?

He akaam ri me ijõ Pahhiti cator xà.

Ne quê ha cato,

ne me ikwÿ pê Ixaher catêjê cunea to ihhimpej,
ne me hamã” hane — hajÿr.

7 Mã aracri Heroti te pyt japôj xà rûm me hûmre krã kreti me mõi atajê na hãhwÿr, ne cute me ajpën par, mã cute caxêti na mehçukij to:

— Jũ caxuw mã caxêti ata cator? — hajÿr. Mã me cumã:

— Caku pyxit jirôa pê ri ramã cator — hane.

8 Jirô pê mã ri cute Pãw jõ krĩ wÿrmehkujahêc, ne me cumã harkwa hêj xia hyr to:

— Ca ha me pra ne jûm krare ita na me acato, ne me imã harën par peaj ne. Mãr wa hanea ne me acuxà hõmpu, ne itÿj amji mãhûpa, ne imã ihkînti ne — hajÿr.

9-10 Mã cute me pjê jõ pahhi ata jarkwa par jirô pê mã ma me pra, ne pry kôt hipêr cute me pyt japôj xà rûm caxêti ata pupun. Necute me caxêti pupun xà ata pyrênampeaj kam me hakry, ne me cumã amji kîn. Mã caxêti ata me cumam tẽ, ne Marij ikre kam ihkra to hÿr xà atacwÿrpê hàhhuc.

11 Mã ikre mã me hàr, ne cute me Marij me ihkra ata pupun, ne cute amji mã me hûpahti na amji to me ipipêprãmte, cuna mã mehkôn krã na me hÿr. Ne me cumã mehkînti na me amjijarën jirô pê, cute me cumãampo cjên xà jihé mën, ne me cumã me ampo pejti jôr xà atajê jôr. Atajê pê wakÿre prà tepti pê ôr me, ampo jacrô cuxwati ata me, ampo pêpïhhôc pê ràm jïn pyrác, ne cuxwati ata me. Ne ampo atajê cunea na hÿjàhwÿar to hàhwÿr.

12 Mã caxwa ata kam Pahpãm te me hõt kam me cumã hûjarën, ne me cumã:

— Me apê pyt japôj xà pïn me acator catêjê, ca ha nee hacpÿ mãHeroti pê pjê jõ pahhi ata wÿr

me amji jaxàr, ne me cumã ahkrare nõ atajarên nare — hajÿr. Cwÿrjapê ri me hõpjê wÿr, ma pry nõa kôt, cute me amji jaxàr.

Pê Ejit jõ pjê wÿr me cuto

¹³ Mã me hõmpun catêjê, ma ramã memprar jirô pê, cõkwa pĩnPahpãm mã memprar catê nõ te Joje jõt kam cumã ihkra to hÿjarên to:

— To jÿ ne gĩxi me ihcãnter to atẽm pyrentu, ma Ejit jõ pjê wÿr, ne curiame ahtwÿ ne me akrĩ. Wa ha pa jũ caxuw ate me amji jaxàr xà to meamã awjarẽ! Ampo na? Nee mã ampo na nare. Pjê jõ pahhi pê Herotiihtÿj apu ahkrare ita japê, cute ihcuran prãnte — hajÿr.

¹⁴ Mã Joje jÿjarêan kam hÿr ne cute ihkra impÿn, ne ma caxwaa riinxi me, Ejit jõ pjê wÿr me to tẽ, ne amcro nõa na curi me cator.

¹⁵ Ne curia me hàhhuc ne mehkri, ne curi mehkri ita na mã me ahnaaHeroti tyc, mã cormã hacpÿ mã, cute me amji jaxàr. Ne pê rÿ pêa mã ramã Pahpãm jarkwa to ihcakôc catêjê Jeju na, me hõ kàhhôc kam, mehhôc ata harên to hane he:

“Ite, por Ejit jõ pjê kam apu ikra mõi ata na, ijàhwÿr” hane.

Pê ihkàhhôc kam ahna mehhôc xà ata na pê hane.

Pê Heroti me ahkrare jipej

¹⁶ Mã Heroti te pyt japôj xà rÿm cute amji jahkre pejti te caxêti pupun catêjê te mempar nare na, me hahkre pej, ne ame kam incryac to

me kam incryc. Ne cute hõ krãhtaremã ahkrare xũmre curan na harkwa hyr to:

— Ca ha Pãw jõ krĩ me, krĩ ajpẽn cahi nai-hcuhhê atajê cunea kôt me ahkrare xũmre na caku pijakrutnare atajê cunea curan to me mõi — hajÿr. Mã harkwa kôt cute me hipej.

¹⁷ Ne pê Jeremij pê Pahpãm jarkwa to ihcakôc catê ata ramã rÿ peamã ita jarẽn to hane he:

¹⁸ “Quê ha krĩ ata kam ame amrãhti.

Quê ha pyjê cunea amehkra japê xà toamencwÿr to me ipa kam me to incrà tu.

Ne tee ame hõhtÿj to prãm.

Ampo na?

Nee mã ampo na nare.

Quê ha me cupê mehkra xũmre cunea me ty, cwÿrjapê quê ha cama amencwÿr to ame ipa” hane.

Mã hũjarẽn xà ata na cute hajÿr.

Pê Ejit pĩn me amji jaxà

¹⁹ Mã Heroti tyc jirô pê mã, cõjkwa pĩn Pahpãm mã memprar catê nõte Joje jõt kam hÿrmã cator, Ejit jõ pjê kam, ne cute cumã hũjarẽn to:

²⁰ — To jÿ ne gĩxi me ihcãmter to ma hacpÿ mã me gõ pjê wÿr amji jaxà. Ampo na? He nee mã ampo na nare, ramã, por cuteme akra curan prãm atajê tyc par — hajÿr.

²¹ Mã Joje jÿr, ne cute ihkra impÿn, ne ma inxi me, hacpÿ mã me to amjijaxàr, ne me to mõi, Juta jõ pjê wÿr.

²² Ne cute me Arquirãw pê Heroti xwý kra pê hũm jaxà kam pahhi na me harẽn par. Na ri curi me mehkrĩ na me cumã hũpaa to hũpa. Cwýrjapê ri hipêr Pahpãm te Joje jõt kam Hĩpôjajo jõpjê wýr me hator.

²³ Mã ma harkwa kôt hacpỹ mã Hĩpôjajo jõ pjê wýr cute me amji jaxàr. Ne curia hipêr Naxare jõ krĩ kam mehkrĩ. Ne pê Pahpãm jarkwa to ihcakôc catêjê nõ ramã rý pèa mã Pahpãm kra pê ahkrare ata jarênto hane he:

“Naxare jõ krĩ pĩn pê cato” hane.

5

Parixêw catêjê jirôa pê me pampej na me pamã ihprãm

Matew 5.17-30

¹⁷ Ne Jeju hanea ne me cumã:

— Nee ca, ite Mojxe xwý me, Pahpãm jarkwa to mehcakôc catêjê te me hapackre xà ata to hamreprãmte icator na, ame icãmjĩ nare. Wa quêt catyt kam, cute me hapackre xà ita kôt ipa, ne me amãihkôt harẽn to imej to ihcuhtacti, ca ate kam me gapac, ne icuxà catyt kam me apa prãmte, wa icator.

¹⁸ — He wa nee ame amã ihêj xi jarẽn nare, ne ampeaj kam wa me amã awjarẽ. Quê ha nee cõjkwa me, pjê kam ampo cunea jamre xà wýr Mojxe xwý me Pahpãm jarkwa to mehcakôc catêjê te me amji kam hapac xà na ihkàhhôcata hóc pyxitre nõ ipictor nare. Quê ha hajýr to ihcuhhê rohnýtĩ mã, ne ihkàhhôc kam cute

mehhòc catêjê te ampo te jũ mǎn xà atajêquê ha ihtỳj hane.

¹⁹ Na quê ha jũm te Pahpãm te me pamã harkwa jirên xà ata par nare, ne amjia kôt, amji kôat jũm jũpar nare to cumã hahkre na, quê ha ihtỳj còjkwa kam Pahpãm himpejxà kam incrire ne, ne Pahpãm cuna mã ihkêanre. Jĩkjê na, quê ha jũm te Pahpãm te mepamã harkwa jirên atajê kam hapac, ne amji kôat catyt kam, jũm jũpar to cumã hahkre ata, quê ha còjkwa kam Pahpãm himpej xà kam catia to cati.

²⁰ — He ampeaj kam wa me amã harê. Parixêw catêjê me, Mojxe xwỳ te me hapackre xà to hahkre catêjê me, me cumãa ihhêj ne catyt kam meipa. Ne Pahpãm mãa nee catyt kam me ipanare. Na ca ha Pahpãm himpej xà mã me acjêj prãm na, ca ha itajê jirôa pê catyt kam me apa to prãm.

Cu ha nee jũm kam me pancryc nare

²¹ — Xà pê ca nee Pahpãm te me aquêtjê mã harkwa hyr to:

“Nee ca amehcuran nare.
 Quê ha jũm ahcura,
 ca ha ma cute mehçukij catê wỳr me to pra,
 mǎr quê mehkên na me hahkre pej,
 ne mehkên jahpan xàna mehkên mã me cumê”

hajỳr kam me gapac nare?

²² Ne wa ha me amã ihkwỳ jirô pê tỳj ita jarê he:
 “Quê ha jũm te apu mehkwy nõ kam incryc na,
 quê haihtỳj cute apu kam incryc ita na hanea

ne mehçukij. Ne quê ha jŭm mehkwÿ nõ mã harkwa to: ‘Ampo cunea na gamreare’ hajÿr na, quê ha ihtÿj cute cumãn xà ita jahpan xà na cute mehçukij catê wÿr me to mŏ. Ne por jŭm apu mehkwÿ nõ mã haprÿ kêanre pyxwÿ ata, quê ha ramã me pahçurê xwÿn pê Xatanaj jŏ cuhy wÿr mŏr xàa kam ipa”.

Cu pahte me to ihcupan xà to impej pyrentu to prãm

23-24 — Na ri cute hajÿr. Nãmri ca ha ate Pahpãm mã hŭrkwa kam ampo jŏr to amŏr na, ne curia ate me akwÿ nõ te ampo na akam incryc na to amji japackre na, ca hacuria ate Pahpãm mã ampo jŏr xà ata jicu, ne ma tẽ ne mam me akwÿ nõ me ajpẽn mã acaprĩ, jirô pê ca ha amji jaxà, ne cormã ate Pahpãm mã ampo jŏr xà ata gŏ.

25 — Ne quê jŭm akam incryc na, ato xwahna prãmte, ma mehçên cukij xà wÿr me ato mŏrkwÿa kam, ca ha me amji to impej. Ampo na? Ca ha ate me amji to impej nare kam ahnaa mehçên cukij catêacato, ne cumã me agŏ, quê ha makrãhtare mã me agŏ, quê ha me gaxà.

26 He ampeaj kam wa ha me amã awjarẽ. Quênee gãmjŏr par nare kam, jŭm amã hikran nare.

27 — He xà cute me amã Pahpãm jarkwa jarẽn to: “Nee ca ahti na ame pyjê to me axy nare” hajÿr na gŭpar nare?

28 He wa ha me amã ihkwÿ jirôa pê ihpa tÿj ita jarẽ he: “Quê ha jŭm cama pyjê nõ pupu, ne

kam cumã amji caprêp ata, pêihhêj ne ramã cute ahna hũhkra” hane.

²⁹ — Cwÿrjapê quê ihhêaj to awpôc rûm ato akên na aton prãmte ampo kên pupu, ca capa neto awcapê. Nãmri ca ha ate caxâr nare na, quê ha gĩcunea ihkên mã axà.

³⁰ Ne quê ihhêaj to awpôc rûm gũhkra akên na aton prãmte ampo kên to, ca hanea nehakep ne to awcapê. Nãmri ca ha ate hakep nare na, quê ha gĩcunea ihkên mã axà. He me pamã me pahcukrã xà te amji jĩkjê ita na, cute jũ mãn nare, ne Xatanaj jõ cuhy kam me pajĩ cunea pÿpÿm xà ata ri ampo kên itajê cunea jirôa pê ihkêanre.

Cu ha nee ihcaprÿ na Pahpãm japrÿ na to amji mã me pahcakôc nare

Matew 5.33-37

³³ — Pê Mojxe xwÿ me panquêtjê mã: “Ca ha ate Pahpãm japrÿ na ampo na cumã amji ton na, ca ha atÿj to” hane.

³⁴ Ne pa, wa ha quêt cama amã to hahkre to hane he: “Ca ha ate ampo na amji ton xà ata kam, ca ha nee ihkaj na Pahpãm japrÿ to acakôc to, ‘ÿhÿ, wa ha Pahpãm japrÿa na itÿj to’ hajÿr nare. Ne nee ca hanea ne ihcaprÿ na cõjkwa pê Pahpãm krĩ xà to amji mãacakôc nare. Ampo na? He curũam ri me pahto ihhimpej.

³⁵ Ne nee hanea ne pjê to amji mã acakôc nare. Ampo na? He pjê ita pê ri ihhêj rûm ihpar pyxwÿr xà. Ne nee ca Krĩpinkrên to amji mã acakôc nare. Ampo na? Hecupê Pahpãm pê Pahhiti jõ krĩ.

³⁶ Ne hanea ne nee ampo kôt akrãa to amji mã acakôc nare. Ampo na? Jũ wÿr ca me anõ amjia kôt me pahkĩ nõ pyxit peaj to haka, nare, to ihtycti ne.

³⁷ Ne quêt ca ha cama harên to, ‘Ýhÿ, wa ha to’, nare, ‘Quê, wa ha nee ton nare’, hane. Ne nee hirô pê mã garkwa nõ to acakôc nare. Ampo na? Pom ca me acakôc to impejti jirô pê, hipêr me ampo na me amji to itajê, Xatanaj pê me pahcurê xwÿn pĩn ri hapôj” hane.

6

Cu ha nee jũm te me pampejti na me pajarên na, mehprãm nare

Matew 6.1-8

¹ — Ne wa ha hanea ne me amã ihnõ ita cawpa he. Co he! Nee ca cute ahna me apupun prãmte me kam mare mã Pahpãm mã hàpên xà impejti atajêton to apa nare. Nãmri ca ha ate me ita tohajÿr na, ca ha nee me còjkwa kam Apãm Cati te me amã ampo pejti jør xà ata cwÿr nare.

² — Ne ca ha ate jũm pê hamreare ata mã cute ampo na ihprãm ata jør na, ca ha aracri cumã agõ. Ne nee ca ha apê jũm pê caxwãm pê cute amji kam hapac xà kên, ne põ rùm ihhêj ne impej atajê nõ pyrác nare. Ne nee ca me cuxà Pahpãm mã mehcakôc xà jürkwa me, krĩcape na apu amji pejti jarên to amõr nare. He jũm te impejti na amji mã me harên prãmte ri, ame hajÿr to mõi. Ne cute amji mã me harên pejti ata pê riikhêj rùm hàmcwÿr xà. Na quê ha nee

Pahpām hipêr cumã ampo jŏr nare na, ca me to amji japackrea ne.

³ — Ne ca ha cute ampo na me prām catêjê mã ampo gŏ, ne ate cumã ampo jŏr xà ata na amji to amxu, quê nee gŏikwỳ nŏ peaj ahna gahkre pej nare.

⁴ Ca ha ampo pejti to, ne atỳj to amxu, ne ahna amji to apimxur peaj ne, quê nee jŭm ahna gahkre pej nare, quê ha Apām Cati pit ate apimxuar pēampo ton xà ata na apupu, ne hahpan xà na amã amgŏ.

⁵ — Ca ha Apām Cati mã acakôc prām, ne nee apê me caxwām pê mehkêanre, ne pŏ rŭm mempejti atajê pyrác nare. He mehkêanre itajê me kam maremã Pahpām mã mehcakôc xà jŭrkwa kam mehcuhhê, ne krĭ cape kam mehcuhhê, ne me kam mare mã me cumã Pahpām mã mehcakôc, ahna mehcunea te me hŏmpun prāmte. Ne cute amji mã me harên pejti ata pê riikhêj rŭm me hâmcwỳr xà na, ca me to amji japackrea ne.

⁶ Na ca ha, jŭm te Apām Cati pupun xà nare ata mã, me acakôc to prām, ne gŭrkwa caxwỳn mã me acjêj ne amji na me to hihê. Ne curia ca ha aracijŭm te, me ate me Apām Cati mã me acakôc na, me apupun nare xà ata mã me acakôc. Quê ha me Apām Cati ata aracri cumã me acakôc na me apupu, ne hahpan xà na cute me amã hâmjŏr xà ata to me amã amgŏ.

⁷ — Ne ate Pahpām mã me acakôc xà atajê kam, ca ha nee me apê mehcakrit pê Pahpām jahkre kêatre atajê pyrác, ne amji cuxà cumã me acakôc xà atajê pit jarên nare. He ihtỳj amji mã

cute me Pahpãm mã mehcakôc to iryti ata kôt, cute me kam hapac na amji mã me to hane.

⁸ Ne me apê me hũrác nare. Ampo na? He ate me Apãm Cati wÿr xà atajê xwÿjrea na, ramã ahna cumã me gahkre pej.

Pê Jeju Hũm Cati mã mehcakôc to hahkre

Matew 6.16-18

¹⁶ — Ca ha gápàn nare kam apijacria kam, Pahpãm mã amji cajrën kam pra, ne nee apê jũm pê pŏ rũm ihhêj ne impej ata ne aracri caxwãm pê cuteamji kam hapac xà kên ata pyrác nare. Ampo na? He cute me hajÿr catêjê quê ha Pahpãm mã mehcakôc tÿaj kam pra, ne ihtÿj pro to ame amji kuc jipro, mâr quê mehcunea ahna me hŏmpu, necute me ipijacri tÿaj kam Pahpãm mã mehcakôc na mehcãmjĩ. Ne cute ampo na amji mãme harën pejti ata pê ri ihhêj rũm me hàmcwÿr xà. Na ca me to amji japackrea ne.

¹⁷⁻¹⁸ Ca ha Pahpãm mã acakôc prãm, ne quêt akuc cuhhŏ, ne akĩ pê, ne amji cũmpej, mâr quê nee jũm apijacria kam Pahpãm mã me acakôc xà ata na me gahkre pej nare. Quê ha Apãm Cati pupun xà nare ata pit, atecumã me acakôc xà ata na me gahkre pej. Ne quê ha ate apimxuar pê ampo pejti ton atajê jahpan xà na, cute amã ampo pejti jŏr xà ata gŏ.

7

Pahpãm wÿr pry me harkwa hatàtre

Matew 7.13-14

¹³⁻¹⁴ — Me ate ito amji mã me ahimpej xà ata pê ihhêj rũm Pahpãm wÿr pry me harkwa

jatàtre, ne ipimxurure ata. Mã nee ahna me hàhtôa ne menciêjnare, ne me pyxitre ne ahna me acjêj. Ne amjia kôt me ipa xà ata pê ihhêj rûm me pahcurê xwÿn jŏ cuhy wÿr pry, me harkwa pohti ne catihti ne hirãa pê hikwa ata. Mã me hàhtôa ne ahna me acjêj. Na ca ha me pry hire pimxurure me harkwa hire ata japê — hane.

Pê me hàhtôti me amji mã me ajkra

Matew 7.28-29

²⁸⁻²⁹ Ne cute me cumã ampo to hahkre jicu, mã me hàhtôti atajê te, cute mempar xà ata to amji mã me ipikrar, ne me ajpên mã:

— Pÿhàpà, mã ajte hũmre ita te me pamã ampo to hahkre xà ita, pê nee cute me pamã Mojxe xwÿ te me pajapackrexà to hahkre catêjê atajê pyràcnare, ne quêt amjia kôt, harkwa kôt, me pamã ampo to hahkre to ipa — hajÿr.

9

Pê Jeju mento tũm to ajkrut ne me caprã

Matew 9.27-38

²⁷ Pê pjê nõ kam Jejuapu mŏ. Mã mento tũm pijakrut ne ihkôt me cumãhàkjêr to mŏ, ne me cumã caràr to:

— Pahhi Tawi xwÿ tàm xwÿ ita, me icaprãa ne — hane.

²⁸ Mã ma Jeju mŏ ne ikre nõ mã me to hàr, mã mento tũm atajê hũ na pire mã me xa. Mã cute mehçukij to:

— Xà ca ampeaj kam ajkĩ amji mã me ito ahimpej? Xà ampeaj kam ite me acaprãr na ate amji mã me ito hajÿr? — hajÿr. Mã me cumã:

— Ÿhỹ pahhi, ca ha atỳj me icaprã — hane.

²⁹ Mã Jeju te hũhkrahhi to mento huc, ne me cumã harkwa to:

— Pom ca ampeaj kam ito amji mã me ahimpej xà ita te ri me acaprãr — hajỹr.

³⁰ Mã hamre, mento itajê caprãr pyrentu, mã ihtỳj me rĩt. Mã Jeju te me cumã harkwa to:

— Ca ha nee jũm mã ite me ato hajỹr xà ita na me ijarẽn nare — hajỹr.

³¹ Mã ma me pra, ne cute me to ihhimpej xà ata kaj na, ihtỳj pjê ata kam mehcunea mã Jeju jarẽn to me mỗ.

Pê Jeju ihpêrkêť caprã

³²⁻³³ Ne memprar jirô pê mã ri ajpên Jeju wỳr me jũm xũmre kam ampo carõ kên, mã ipêrkêťne nee ihcakôc nare to me mỗ. Mã Jeju te intête ampo carõ kên ata cator. Mã cute ihcakôc kam ihtêm. Mã cute me hõmpun catêjê atajê te amji mã me to ipikrar, ne me ajpên mã:

— Wa rỳ jũ caxuw ite me pajõ pjê ita kam, iteme ampo pejtı te hajỹrjê nõ pupun nare — hajỹr.

³⁴ Cakrô mã Parixêw catêjê te ajteare mã me harẽn to:

— Ampo carõ kên jõ pahhi te ri cumã cute mehkwy japôjxà caxuw carôt jõr, ne nee mã Pahpãm te cumã hõrnare — hajỹr.

Pê Jeju mã me caprĩ catı

³⁵ Mã Jeju krĩ catı me krĩ kryjre cunea pupun toihkôt hapôj to ipa. Ne ihtỳj Juta catêjê te me cuprõnxà atajê kôt, me cumã Pahpãm te me to ihhimpej xà jarẽn xà impejtı na harẽn to ipa. Ne

ihțyj Hũm carôt kôt hàpên xà pihho ton, ne me hà catêjê cuneacaprãr to ipa.

³⁶ Mã Jeju te me hàhtôti atajê pupun, ne ampeaj kamcumã me caprĩ xà. Ampo na? Por atajê mã amji kĩn nare, ne me caxwãm pê mehpeacre, mã cama mehkrĩ ne ameajkampa. Ne me cupê ihhêj rũm carà cahàcre pê hamãrcatê nare ata pyrãac, ne ihtyj ame ipa, na ri ampeaj kamcumã me caprĩ xà.

³⁷ Ne cute ihkôt me ipa catêjê mã harkwa to:

— Ampeaj kam me pajàpên xà pê Pahpãm wỳr me to mepapipkjêr xà ita cati. He me pajàpên xà ita pê ihhêj rũm pur kam ampo hy to cuprôn xà pyrãac. Ne me to hàpên catêjê ri cormã menchrêre.

³⁸ Na ca ha còjkwa kam Pahhiti na me ahwỳ, mār quê hipêr ajpên me pamã me hàpêncatêjê kwỳ kujate, quê me cumã hàpên xà ita to apê — hajỳr.

10

Cu ha Pahpãm jarkwa to hahkre catêjê na me amji to pôj

Matew 10.40-42

⁴⁰ Pê Jeju ihkôt me ipa catêjê te tôxi japackre to hane he:

— Ca ha ma Juta catêjê jô krĩ atajê wỳr me pra, ne mehcuea mã ijarê. Ne quê ha me ana amji to pôj me ajkaam, ramã hanea ne ina me amji to pôj. Nehãn ne ina me amji to pôj me ajkaam, hanea neramã, por Inxũ Cati te ajpên pjê wỳrikujahêc ata na me amji to pôj.

41 — Ne por quê ha jũm, jũm pê Pahpãm jarkwa to ihcakôc catê cwÿrjapê ahnaamji capa ata, quê ha ihtÿj jũ caxuw cuxà, Pahpãm te cumã hãmjõr xà ata cwa. Ne quê ha jũm, jũm xũmre impejti incwÿrjapê ahna amji capa ata, quê ha hanea ne cuxà, Pahpãm te cumã hãmjõr xà ata cwa.

42 Ne quê ha jũm te, jũm pê ikôt ipa catê cwÿrjapê, cumã cô pit jõr cakrô, quê ha hanea ne, me cuxà, Pahpãm te hahpan xà na jũm ata mã hãmjõr xà ata cwa. Ita to ca me amji japackrea ne — hane.

12

Pê Jezu mã amji to cati prãm nare

Matew 12.15-21

15-16 Mã Jezu te amji na Parixêw catêjê te amehcuran prãm na me hahkre pej, ne ma tẽ. Mã me hàhtõa ne ma ihkôt me mõ. Mã cute me hàcatêjê cunea caprãr, ne me to impej, ne me cumã:

— Ca ha nee me cumã ite me acaprãr ita na me ijarẽn nare — hajÿr.

17 Ne ampo na ri cute me to hajÿr? He pê rÿ pêa mã ramã Pahpãm jarkwa to ihcakôc catê pê Ixaj xwÿ ata, ita na ihhõac na ri cute hajÿr.

18 Ne pê ihhõc to hane he. Pahpãm hũjarẽn to:

“Ihnãm hã, ite amji mã imã hàpên catê capiita he.

Ne taa mã ri imã ihkĩnti.

Ne taa mã ri imã amji kĩnti to

ne amji to icajpuaw.

Ne wa ite cumã Icarõ Pejti kujahêc,

mã cute cumã amji jŏr,
mãr quê ha Icarŏ Pejti ata kôatmehcukij,
ne me to ajcokjê.

Ne quê ha me cupê mehcahkrit atajê pê Juta
catêjê nare

pê me ijahkre pej nareatajê mã,
ite catyt kam me to ipicokjêr xà jarê.

¹⁹ Ne nee cute amji tŏ cati prãmte jŭm me ajpên
krac ri ihcakôc nare,

ne nee apu hàkjêr nare,

ne nee quê ha cà pécute mempar prãmte ih-
cakôc to iryti nare.

²⁰ Ne quê ha jŭm pê ihhêj rŭm cajcaj hô nŏ ata
pyràc,

ne cajŏc ne ihcaca na xa, quê ha nee ihkwîn pej
nare,

ne quêt hacpÿa mã hãm to impej,

ne ihcuhtac.

Jĭkjê na, quê ha jŭm,

cute amjikam hapac xà ramã ihpeacre,

quê ha nee jŭm ata mã hikran nare,

ne quêt hacpÿa mã to impej.

Ne quê ha jŭm pê ihpôc xà nŏ pyràac,

ne ramãkyre pê pôr ne ihpôc crire ne,

quê ha nee ipĭr quê ha ihtyc nare,

ne quêt to ihpôc cati,

quê ha pôr.

Jĭkjê na, quê ha jŭm,

cute amji kam hapac xà kêanre to apu ipa,

quê ha taa ihtehcajpa,

quê ha catyt kam apu ipa.

Ne quê ha catyt kam me to hajÿrto hãm ita kam,
ahnaa me curê xwÿn tohjê.

21 Ne quê ha pjê cunea kam,
krĩxàre pê mehcahkrit atajê cunea
jũm ata jikaj, ne to pit mã amji mã mehhimpej
to me ipa” hane.

Hõhõ, pê Ixaj xwỳ Jeju na ihhóc to hane.

13

Arỳjhy cahàc kên jarẽn xà

Matew 13.24-30

24 Ne Jeju te hipêr me cumã hũjarẽn xà nõ jarẽn, mãr quê ampeaj kam hũjarẽn xà ita to me amji kampa, ne me cumã:

— Ýhỹ, cõjkwa kam Pahpãm himpej xà ata pê ihhêj rũm me hũmre te ame pjê imejti kam ame arỳjhy imejti kre pyràac. Ne me hõ pur kam arỳjhy pit, ne nee kam ampo hy cahàc nõ te ihho nare.

25 Mã caxwa ata kam ihtỳj nõ ne gõr. Mã ihwỳr curê xwỳn cator, ne aracri cute arỳjhy cahê na ampo hy kên ata kre, ne ma tẽ.

26 Ne ahna putwrỳ pyxit, mã pea arỳjhy cahkô ata kà, ne cute amji to ihhy, mã hanea ne ampo hy kêanre pê ahkêt ita cator ne kam ihhy.

27 — Mã hamre pur kam me hàpên catêjê atajê te me hõmpun, ne ma hõ pahhi wỳr me cator, ne me cumã: “Me ijõ pahhi, mãr ca ate gõ pur kam arỳjhy imejti kre ita? Nõ na mã ajte jũ rũm ampo hy kên ita cator?” hajỹr.

28 — Mã me hõ pahhi me cumã: “Me pahcurê xwỳn nõ te mõrmõ ita ton” hajỹr. Mã cute mehcukij to: “Xà wa itỳj me ampo hy kêanre ita to pôi pyrentu?” hajỹr.

29 — Mã me cumã: “Quê. Ampo na? Ca ha me to pøj pyrentu ne aracri ihkôt mempej nõ capa.

30 Quêt taa ampo hy kên ita ihcuhê, quê ha ahnaa ampo tep xà kam ahtwỳ, wa hacormã me amã harê, ca ha mam me ampo hy kên ata jarê ne mehpre ne cuhy kam me haxwỳ. Jirô pê ca ha cormã me arỳjhy impejti ata jirê ne mehpre, ne nõrxà kam me haxwỳ” — hajÿr.

*Arỳjhy cahàc kên jarê kôt harê xà
Matew 13.36-52*

36 Mã Jeju te me hàhtôti atajê jicu, ne ma ikre nõ ma hàr. Mã ihkôt me ipa catêjê te ahna me hàhtêp, ne mehcukij to:

— Me ijõ pahhi, ampo jarê mã ca ame imã harê? Ampo kôt harê xà mã ampo hy kêanre ita? — hajÿr.

37 Mã Jeju me cumã:

— Ipê me Ahàkà pê ampo hy impejti kre catê ata pyràac.

38 Ne pur ata pê pjê pyràac. Ne ampo hy impejti itajê pê me hũmre pê Pahpãm tekjê atajê pyràac. Ne ampo hy cahàc kêanre ita pê me hũmre kêanre atajê pyràac. Ne me cupê mepahcurê xwỳn pê Xatanaj tekjê, na ri taa me to ìhhimpej.

39 Ne arỳjhy kêhkên xà ita pê ri ampo cunea jamre xà kam Pahpãm te ajpên pê me atoipicokjêr xà pyràac. Ne me hàpên catêjê itajê pê cõjkwa pĩn Pahpãm mã memprar catêjê.

40 — Ahnaa mã ampo hy kên ata te caxàr xà na cuhy kam me haxwỳr xà he, jĩkjê na quê ha

ampo cunea jamre xà ata kam, ihtÿj me hũmre kēanre itajê to hane.

⁴¹ Quê ha ipê me Ahàkà pjê ita wÿr cumã membrar catêjê kujate, quê ha Pahpãm pêPahhiti himpej xà ata pê, cute mehkwȳ kên na me ton catêjê atajê me, cute me ampo kên ton to me amji pyrãc catêjê atajê mea mã, me to pøj partu.

⁴² Ne jũ caxuw Xatanaj jõ cuhy prà tyc xà nare ata kam me haxwÿ, quê ha ame amrã, ne me wa gyj, mehkàj xàhte.

⁴³ Ne Pahpãm na mehkwȳ, quê ha quêt Pahpãm pê Pahhiti himpej xà ata kam mehtetetti ne, ne curia ihhimpej xà ata krac ri, cahê na mehkrī. Ne quê me gũpar xà caxuw me akam me gapac na, ca ha atÿj me awpa.

Ampo pejti pimxur jarēn xà

⁴⁴ — He cõjkwa kam Pahpãm himpej xà pê ihhêj rũm jũm xũmre nõ te jũm jõ pjê kam wakÿre prà tepti pê ôr na hĩ jàhwÿr catiamã cator, ne hacpÿa mã curia to ipimxur pyrãac. Ne cumã amji kĩan kam cumã hàhcukrêjatajê cunea to ihpore na hàhpan, ne hàhcukrêj jõ pore ata to, cute pjê kam ôr jĩ jàhwÿr catia to pimxur ata japrôr. Ne cute pjê ata to hõ tekjêjirô pê mã ri cormã cute ôr jĩ jàhwÿr catia caxàr.

Kēn jaka pràti jarēn xà

⁴⁵ — He hanea ne Pahpãm himpej xà pê ihhêj rũm jũm te kēn jaka pràti japrôr catê nõ pyrãac.

⁴⁶ Quê ha jũ ri ihnõ impejti na, hĩ jàhwÿrti ata nõ pupu, ne ma tẽ ne caxuw cumã hàhcukrêj

atajê cunea to ihpore na ahpa, ne ma to tẽ, neto kẽn jaka pràti ata japrô.

47 — Ne hanea ne Pahpãm himpej xà pê ihhêj rûm cô kam kryhti to tep pro xà ata pyràac, ne ajpẽn caxuw tep cunea na ihpro.

48 Ne quê ha tep to hipu, quê ha cumã ipěr catêjê amcrà wỳr me cupjê, ne me to api, ne me to ihkrĩ, ne tep to ame ajcokjê pyràac. Ne impejcatêjê quê ha kàhà kam me cucjê, ne ihkêanre catêjê quê ha ma pŏ mã me to awcapê.

49 — Ita jĩkjê na quê ha ampo cunea jamre xà wỳr, quê ha Pahpãm mã memprar catêjê, côjkwa pĩn me hapôj, ne mempej pê Pahpãm na mehkwy tète mehũmre kẽn to haprãr partu.

50 Ne Xatanaj jŏ cuhy tyc xà nare ata kam mehkên catêjê cunea to me awcapê, quê ha curia mehkàj xàhte ame amrã, ne ame wa gyj — hane.

Ampo wej me intuw jarẽn xà

51 Mã Jeju te ihkôt me ipa catêjê cukij to:

— Xà ca ate me ampo ita par? — hajỹr. Mã me cumã:

— Ýhỹ — hane.

52 Mã me cumã:

— Ca ha me ate, ite amji kam ijapac xà kam me gapac, ne hanea ne ate me Mojxe xwỳ te me hapackre ne me cumã to hahkre na, ca ha me apê ihhêj rûm jũm pê mehkra mã hũrkwa pĩn cute ampo wej me ampo tuw to hapôj pyràac. Neihtỳj me cumã mam cute amji kam me hapac xà wej me hapu na, curmã cute amji kam me hapac xà intuw itato hahkre — hane.

17

*Pê Jeju Hũm Cati jũrkwa caxuw ihpore gŏ
Matew 17.24-27*

²⁴ Mã Jeju me, ihkôt me ipa catêjê me, ma Capernam jŏ krĩ wỳr me cator. Mã me hŏ pahhiti jarkwa kôt me hũhkra kam me hãmchwỳr catêjê nŏ te me Petrô cukij to:

— Xà quê ha gŏ pahhi, Pahpãm jũrkwa jamãr catêjê jŏ pahhiti mã hãmjŏr nare? — hajỳr. Mã Petrô cumã:

²⁵ — Quê ha ihtỳj me cuxà hàr jahpan xà na amgŏ — hane. Ne cormã ikre mã Petrô xàr, mã Jeju te ihcukij pyrentu, ne cumã:

— Jũ mã mã ca ita to amji kam gapac to? Ne jũmjê quê ha krĩ ita jŏ pahhi mã me amgŏ? Xà ajkĩ krĩ kam mehkrĩ catêjê nŏ, nare, jũm cahkritmã curi ihkrĩ prãm ata quê ha ajkĩ amgŏ? — hajỳr.

²⁶ Mã Petrô cumã:

— Mehcahkrit catêjê quê ha me amgŏ — hane. Mã Jeju cumã:

— Ate to hamãrti mã ne harên, ampeaj kam ri ita! Ne ita jarên xà te, quê nee curia mehkrĩ catêjê nŏ hãmjŏr to prãm nare. Cwỳrjapê ri nee ijàmjŏr xà nare. Ampo na? Inxũ Cati jũrkwa ri, ne ipê ihkra.

²⁷ — Ne nee imã me hũhkra kam me hãmchwỳr catê ita te, pahte amji mã me Pahpãm cupa nare na, cute me pahto amji kam hapac na to prãm nare. Cwỳrjapê caha ma hĩpô wỳr tẽ ne kam ajore mẽ. Ne mam ate to tep pro ne to gàpir ata jarkwa kam, ca ha ihpore hy pupu ne capa, ne

ma hàmcwỳr catê wỳr totẽ, ne paxàr jahpan xà na to amgõ — hane. Pê harkwa ita kôat ita hane.

18

Cute ampo kên tète jũm japackre xà Matew 18.15-35

¹⁵ Ne Jeju te hanea ne ihkôt me ipa catêjê mã:

— Quê Pahpãm na mehkwỹ nõ acuna mã ihkên xà nõ to, ca ha ma hỹrmã mõi, ne ahte ajpẽn na me ajkrut peaj ne cumã cute ato kên xà ata jarẽ. Quê ha cute aparna, ca ha curia hacpỹ mã me ajpẽn to impej.

¹⁶ — Quê apar nare, ca hacpỹã mã amji jaxà ne amji caxuw jũmjê to ajkrut, nare, mencrẽ ne me haprô, ne ma hỹrmã me to mõi. Quê ha cute ato kên xà na me hõmpun xà atajêa na me cumã harẽ. Nãmri pê mam ramã Pahpãm jõ kàhhôc harẽn to hane he: “Quê jũm pyxit peaj mehcukij catê wỳr tẽ, ne cumã jũm jarẽn to kên na, quê ha nee impar nare, nãmri quê ha jũmjê incrẽ ne cute hõmpun xàa na ajpẽn kôt me harẽnna, quê ha ihtỳj mekampa” hane. Quê ihhêaj to me akampa ne ihkên ton jicu, ca ha hacpỹã mã me ajpẽn to impej.

¹⁷ — Quê ihhêaj to me akwỳ nõ ata me apar nare, ca ha Pahpãm na mehkwỹ mã ihcunea naharẽn pa, mår quê taa me acuxà cumã mehcahôc. Quê ha nee Pahpãm na mehkwỹ par nare na, quê ha cupê mehcahkrit pyrác, ne cupê Pahpãm jarkwajahkre kêt catêjê nõ, ne cupê Pahhiti jarkwa jirô pê ihpỳpỳm catê. Ne cupê

amjia kôt ipa to prām catê, ne ihtỳj ampo kêanre ton to ipa.

Me pahte ampo ton itajê cunea na, Pahpãm me pahto amji japackre

¹⁸ — Ýhỹ, pom ate pjê kam ampo kên cahpêrhyr ita, haneane cōjkwa kam ate ihc-ahpêrhyr. Ne hanea ne ate pjê kam ampo pej to tojnō ita, hanea ne cōjkwa kam ate to tojnō.

¹⁹ — Ne hanea ne pjê kam cute ito amji mã mehhimpej atajê, quê ha jũmjê ajkrutne ijapr̃ya na, ajpêan kôt me hàhwỳr na, quê ha cōjkwa kam Inxũ Cati ihtỳj ampo na me hàhwỳr xà ata to me cumã.

²⁰ Ne quê jũ ri jũmjê incrêre cakrô, amji mã ijapr̃y to pōj xà ata kam, wa ha ramã ame cahê na ipa — hajỹr.

Cu ha jũm te me pahto kên ata kam me pancryc jicu ita na

²¹ Mã Petrô Jeju na hàhtêp ne ihcukij ne cumã:
— Ijō Pahhi, jũ mã wa ha? Xà wa ha ikjê te ito kên to xet xà ata na kam icryc jicu, ne cute ito kên atajê na to tojnō to xet? — hane.

²² Mã cumã:
— Jũ wỳr ca cute ato kên xà ata jahpan xà na, kam acryc jicu to xet peaj. Ca ha cute ato kên ata na to tojnō to xetxênta, ne nee cormã kam acryc jicu to tojnō nare — hane.

Jũm te nee ihkwỳ nō te to new ata to tojnō nare jarên xà

²³ Ne Jeju mehcunea mã ihkôt harên to:

— He côjkwa kam Pahpãm himpej xà te amji kam hapac xà pê ihhêj rŭm jŭmjê te hŏ pahhi mã me hàpên, ne cute ajpên mã me hŏ newto mehcakôc, ne ahna me ajpên par ata pyrâac.

²⁴ Ne mam cute ihpore to, cute to new to mirjãw ata, pahhi ata wÿr cator.

²⁵ Mã cumã hàpên catê ata pê cute to new catihti ata caxuw ihporejamreare. Mã hamre, hŏ pahhi te jŭm te to new atato ampo na hàhpan na me mên, hĭxi me mehkra mea mã. Ne hanea ne hàhcukrêj cunea to hŏ new ata caxuw ihpore na me to hàhpan par na, cute me mên.

²⁶ — Mã cumã hàpên catê ita hŏ pahhi cuna mã ihkôn krã na hÿr, ne cute ahna hàhwÿr ne cumã:

— “Ijŏ pahhi, ito amji mã awjamã, wa ha itÿj amã ijàmjŏr to imŏr ita kam ijàmjŏr pa!” hane.

²⁷ Mã hŏ pahhi mã caprĭ xà, mã cute hŏ new catihti ata mea mã, ihcunea na to tojnŏ.

²⁸ — Mã ma cute hŏ pahhi to new ata na tĕ. Ne cute jŭm te ihpore hy te xĕj peaj to, to new ata cajpar. Mã cute jŭm ita jŏkre riihcuhtom, ne apu to ahcujrŏ ne cumã:

— “Imã amgŏ! Ampo to ate ito new ata jahpan xà na imã amgŏ!” hajÿr.

²⁹ — Mã jŭm ita cuna mã ihkôn krã na hÿr, ne ahna hàhwÿr, ne cumã harkwa to:

— “Ito amji mã awjamã, wa ha itÿj amã ijàmjŏr to imŏr ita kam ijàmjŏr pa!” hajÿr.

³⁰ — Cakrô, mã nee ajte cute impar nare, ne ihkên mã mên. Ne cute me hacjên xà kam haxàr, mâr quĕ curia ihcuhhê, ne ihcuhhê xà ata to cumã amgŏ.

³¹ — Mă hamre, me hâpên catêjê na mehkwyî nõ, cute ihkên ton ita na hõmpun, ne apu kam incryac to incryc, ne ma hõ pahhi te to tojnõ ata wÿr tẽ, ne cutecumã harên par.

³² — Mă pahhi te hipêr cumã hâpên catê ata na hâhwÿr ne cumã harkwa to:

— “Imã hâpên catê kêanre ita! Ca ate iwÿr, wa ite ate ito new catihtî ata na ato tojnõ, ca ma tẽ.

³³ Ne nee ate amji cuxà akwÿ nõ ata caprî, ne to tojnõ nare icuxà, pom wa iteacaprî ne amã hikran, ca ma tẽ ita? Ampo na mã ate icuxà to hajÿr nare?” hane.

³⁴ Ne hõ pahhi ita apu kam incryac to incryc, ne ma me hacjên xà wÿr cute cumã hâpêncatê ata kujahêc, mã cute me haxàr. Na quê ha curia ihcuhhê, ne amji pupun to kêanre to ihcuhhê, ne xacute ampo to hõ pahhi to new atajê cunea jahpan xà na hãmjôr pa, necormã amji caprã — hajÿr.

³⁵ Ne Jeju te me cumã hÿjarên jicu xàa kam me cumã:

— Ca ha cute me ato new catêjê me, cute me ato kêncatêjê atajê to tojnõ ne me hîcu nare na, quê ha cõjkwa kam Inxũ Cati me acuxà nee ate me to kêncatêjê to tojnõ ne hîcu nare — hajÿr.

20

*Pur jō pahhi me cumã hâpên catêjê jarên xà
Matew 20.1-16*

¹ Mă Jeju te hipêr me cumã hÿjarên ne me cumã:

— Cõjkwa kam Pahpãm himpej xà te amji kam hapac xà pê ihhêj rÿm pÿxô krô kre catêjê jō

pahhi pyràac. Ne ma hãn ne iràrætia na, cumã me hàpên catêjê japên to pra, cute mehkwy cajpar, ne hàpên xà na me ajpên par prãmte.

² Ne pê pjê ata kam, pê amcro pyxit to me hàpên jahpan xà na ihpore hypyxit to ajco me amji mã amgõ. Na ri mehkôat amcro pyxit to me hàpên to pyt jahpan xà na ihpore ihhypyxit to me cumã hàmjör xà na cute me ajpên par. Ne ma cute me hàpên xàwÿr mehkujahêc, mã me hàpên to mõi.

³ — Mã ramã ahna pyt jàpir, mã ma krĩ cape na hipêr cumã me hàpên catêjê japênto tẽ. Ne curi cute me hũmre kwÿ te nee ampo to mehàpên nare, ne cama ame ipa atajê kwÿ pupun.

⁴ Mã me cumã: “Ca ha me hanea ne me imã ijõ pĩxô to apê, wa ha ate me gápên xàatajê jahpan xà na catyt kam me amã amgõ” hane.

⁵ Mã ma me mõi.

— Mã ramã pyt me pahkrã jimoc kam hÿr xàa kam, cutehipêr itajê to hajÿr, ne cute me haprôr, cumãme hàpên xà caxuw. Ne ramã pyt pec to mõi, mã cute hipêr itajê to hajÿr.

⁶ Ne ramã pyt xàr xàa wÿr, mã ma hacpÿ mã curi cute me cumã hàpên catêjê japrôr xà wÿr amji jaxàr. Ne cute hipêr me hũmre kwÿpupun, mã mehkrĩ, mã cute mehçukij to: “Ampo na mã ita kam ampo to me gápên nare kam, me ana pyt?” hajÿr.

⁷ — Mã me cumã: “Ampo na? He nee jũm te me imã me ijápên xà nõ jarên nare na ri” hajÿr. Mã pĩxô na pur jõ pahhi te mempar ne me cumã: “Ca ha hanea ne imã me apê” hajÿr.

8 — Mã pyt xàr xàa kam, mã pĩxô na pur jŏ pahhi te cumã me hàpên catêjê jŏ pahhi na hàhwÿr ne cumã: “Me hàpên catêjê mã akij, ne me cumã gàmjŏr pa. Ne ca ha hapua na ite me haprôr atajê mã mam gàmjŏr kam tẽ, ne hapua na ite mam me haprôr itajê mã amgõ” hajÿr. Mã harkwa kôt cute ton.

9 — Mã ramã pytre kam, me hàpên kam cute me to ihtêm catêjê atajê teahpÿanre na ihpore ihy pyxit ne mencwÿr par.

10 Mã iràrætia na cute me hàpên kam ihtêm catêjê atajê, ihtÿj me hirôa pê me hàmcwÿr na me amji cãmjĩ cakrô, mã cute me cumã ihporeihy to ihcahkũm atajêa jŏr.

11 Mã cute amencwÿr, ne me hŏ pahhi na mehcahôc kam mehtêm.

12 Ne me cumã: “Pÿhàpà! Pom hapua na me hũmre jàpên kênre itajê jàm cwÿr xà me, me ijàm cwÿr xà ita pipëan ajte? Wa iràrætia na ite me ijàpênkam itêm. Ne amcro mã me ijũcanãar kam, ite me ijàpên to pyt cakrô, mã ajte me ijàm cwÿr xà itajê pipëan!” hajÿr.

13 — Mã pĩxô na pur jŏ pahhi te me cumã harkwa to: “Me ikwÿ nŏ catêjê me ikampa, wa nee ite to ihnŏ cupan nare. Mâr cu pahte ihpore hy pyxit peaj na ate me gápên to pyt na, pahte me ajpên par ta?

14 Me gŏ pore incwa, ne ma me gũrkwa wÿr me to pra. Wa mam ite hũmre mã ijŏ pore to ijàmjŏr to prãm ata to, wa ite hapua nahũmre itajê mã ijàmjŏr, ne me ato ipipên partu.

15 Xà wa ha nee ajkĩ ite ijŏ pore to ijàmjŏr na prãm ata to ijàmjŏr nare? Xà ca ite me to

impejtixà ita jũ na, ca ame kam acryc?” — hajÿr.

¹⁶ Ne Jeju te harĕn jicu xà kam me cumã:

— Quĕ ha jũ caxuw Pahpãm pĕ pĭxô na pur jŏ pahhi ata pyrãac. Ne mehkryjre me, me cati to ajpĕan. Ne hapua na me ipa itajĕ me, mam me ipacatĕjĕ to ajpĕan — hajÿr.

21

Mehkra te hũm kam hapac, ne me kam hapac nare jarĕn xà

Matew 21.28-32

²⁸ Ne Jeju te cute amehcukij catĕjĕ mã ampo to hahkre prãnte me cumã:

— He pĕ hũmre nŏ mã ihkra xũmre ajkrut. Mã cute mam ihkà ita mã harkwa to: “Ikra, ita kam ca ha imã ite pĭxô krô kre xà ata kre” hajÿr.

²⁹ — Mã ihkra ita te impar ne cumã harkwa to: “Imã imŏr prãm nare” hane. Ne hapu na cute amji kam hapac, ne ma tĕ.

³⁰ — Mã hanea ne ihkra nŏ mã cute harkwa to: “Ikra, ita kam ca ha imã ite pĭxô krô kre xà ata kre” hajÿr. Mã ihkra ita te impar ne cumã: “ÿhÿ inxũ, wa ha itÿj tĕ” hajÿr cokrô, nee mŏr nare.

³¹ — Mĕr hŏhŏ, wa ha ita na me acukij. Me amã, jũm mã pĕ hũm te amji mã ampo na to prãmtixà ata tŏ? Xà mam kà ita, nare, hapu na ita? — hane. Mã cute impar ne cumã:

— Por mam ihkra xũmre kà ata — hajÿr. Mã Jeju cumã:

— He me apĕ hapu na jũm mã ihkra ata pyrãac. Ne atÿj me garkwa to me apĕ Pahpãm kŏt me apa catĕjĕ na me amji jarĕ, ne nee ihkŏt me apa nare. Me amãa me hũhkra kam me

hàmcwÿr catêjê atajê me, pyjê inxyre atajême girôa pê mehkêanre cakrô, mãmamã me acumam Pahpãm himpej xà mã mencjêj to me mō.

³² Ampo na? Pê Jowāw ajpên me awÿr mō, cute me amã pry ata jarên prāmte, ca ajte nee ate mempar ne amji mã me to me ahimpej nare. Ne mehũhkra kam me hàmcwÿr catêjê me, pyjê inxyre atajê te mempar pyrentu. Ca ate me ita pupun cakrô, ca nee ate me to amji mã me ahimpej ne mempar nare — hane. Mã ma me pra, ne nee hipêr cute mehcyt nare.

25

Pyjê te tej jarên xà Matew 25.1-13

¹ Mã Jeju te, cute amji jaxàr xà to me cumã hahkre prāmte me cumã:

— Amcro ata kam, quê ha cōjkwa kam Pahpãm himpej xà ata pê ihhêj rŭm mecuprÿ te tej atajê pyràc. Ne cute ahpÿanre na me hō pôc xà incwÿr, ne pry cahti ri me to jŭm xŭmre jikwa tuwxà ata jikaj. Ne caxwa ri ihtÿj mehkrĩ ne me hikaj, cute me hŭnār ne mehkôt cahāj ata jŭrkwa kam amji kŭn wÿr me hār prāmte.

² — Ne me cuprÿ te xĭc ne mehkrã nare, ne mehkwy te xĭc itajê quêt mehkrã kre te amji jahkre pejti.

³ Ne por mehkrã nare atajê te ame hō pôc xà incwÿr, ne nee caxuw amji mã me cacô incwÿr nare.

⁴ Mã quêt mehkwy te amji mã me cacô incwÿr.

5 Mã cormã hũmre jikwa tuw xà na mehkwy itajê apu mehkên, mã ame hõt ne pry cahti ri ame hikaj xà ame hikwa ne ame gôr.

6 — Mã ramã caxwa picapôn kam, cute mehkrãhhia kam mençrer na mempar. Mã me cumã caràr to: “Ramã me hikwa tuw xà na mehkwy me amji to mō! Ajpên cuna mã me pra!” hajÿr.

7 — Mã me cuprÿ te me tej itajê amehkrĩ, ne ame ipimprar, ne cute ame hō pôc xà atajê to impej par, mãr quê me cumã ihpôc pej.

8 Mã hamre me cuprÿ krã nare atajê pê ihpôc xà cacô jamre, mã me cupê ihtyc, mã mehkwy mã: “Me imã gō pôc xà cacô kwÿ incire ne. Ampo na? Ramã me ipê me ijō pôc xà cacô jamre, ne ramã ihtyc to mō” hajÿr.

9 — Mã me cuprÿ krã kreti atajê me cumã: “Jũ wÿr quê. Hamreare, jũ wÿr quê incire ita kam me pahcatwÿ. Ca hama me pra ne caxuw amji mã mehkwy japrô” hane.

10 — Mã ma ihpôc xà cacô kwÿ japrô to me pra, mã me hakàn pê me hikwa tuw xà na mehkwy cator. Mã cute me cumã me hikwa tuw atajê jũrkwa jarkwajihê mên, mã amji kĩn wÿr mehkôt me hâr. Mã me ahna cute me to hihê.

11 — Mã me ahna ahtũmre, mã mehkrã nare atajête amji mã me cacô japrô, ne me cator, ne ame caràr to: “Pahhi, pahhi, cama me ijamã, wa me cuxà me acjêj!” hane.

12 — Mã me cumã: “Ipê me gahkre kêatre, wa nee ite pry cahti ri me anō pupun nare. Ne ramã ikre mã mencjêj xà jirô pê ihpÿm, mã hihê” hane.

13 — Hōhō, cwỳrjapê ca ha me amji jamã, ne me gâhcuprôn hiahpuro, nãmri me apê ipê me Ahàkà te amji jaxàr xà jō amcro ata jahkre kêatre, cõt ca ihhêaj to ahtwỳ — hajỹr.

*Me ajpên pê me pahcunea to ipicokjêr xà
Matew 25.31-46*

31 Mã Jeju te me cumã Pahpãm te mehcukij xà to hahkre prãmte me cumã:

— Quê ha me Ahàkà amji to Pahhiti, ne ajpên ahpar mã mō, cu mã memprar catêjê cunea me, ne pahhi krī xà catia ata kam me jỹ.

32 Quê ha pjê kam mehkrī atajê cunea cuna mã me cuprō, quê ha me to ajcokjê. Pom ahnaa mã carà cahàcre hôhti to me ipijapar catêjê, hãn ne ihhōhti ita pê, increcrti to caprã ne to ajcokjê he, ita na quê ha me ato.

33 Ne quê ha awpôc rûm carà cahàcre hôhti to cuprō, ne awke rûm ihhō nare itajê to cuprō.

34 — Ita na wa ha ipê me gō Pahhiti awpôc rûm me xa itajê mã ijũjarên to: “Por Inxũ te me ato impej atajê, ajpên me mō. Ajpên me mō ne ihhimpej xà krac ri me axà. Por pê mam pjê teamji ton xwỳjrea na, Inxũ me amã ihhimpej xà to ata mã, ca me acjêj.

35 Ampo na? Nee mã ampo na nare. He pê imã prãm, pê ca me imã ijarte. Ne imã kôr, pê ca me ikôm. Ne icahkrit cakrô, pê ca me gũrkwa wỳr me ijaprô.

36 Ne pê ipê ikà nare, pê ca me imã ikà gō. Ne pê wa ixà, pê ca me ijamã. Ne pê me hacjên xà kam me ijaxà, pê ca ma me ipupun to me apa” hajỹr.

37 — Mã mempejti atajê te mehcukij to: “Pahhiti, jũ caxuw ri amã prãm, wa ite me amã gõ jõr? Ne amã kôr, wa ite me amã cô jõr?”

38 Ne jũ caxuw ri acahkrit, wa ite me ijũrkwa wÿr me gaprôr? Nare, apêakà nare, wa ite me amã me akà ita jõr?

39 Ne jũ caxuw ri axà, nare, cute me gaxàr, wa ite me apupun prãmte awÿr me mõi?” hajÿr.

40 Mã Pahhiti te impar ne me cumã: “Ampeaj kam wa ha me amã awjarẽ, por ikôt me ipa catêjê kryjre nõ mã ate me acaca xà tonata, imãa ca ate me ton” hajÿr.

41 — Jirô pê mã ri cute awke rũm amehcuhê atajê mã: “Icuna mã me akêanre atajê, ipê me ajcamẽ. Ne maXatanaj me, cumã memprar catêjê mã, iteme to kên xà na cuhy tyc xà nare ton ata wÿr me pra.

42 Ampo na? Nee mã ampo na nare. He pê imã prãm, pê ca nee me imãijarte nare. Ne imã kôr, pê ca nee me ikõm nare.

43 Ne pê icahkrit, pê ca nee me gũrkwa wÿr, me ijaprôr nare, ne ipêikà nare, pê ca nee me imã ikà jõr nare. Ne pê ixà, pê ca nee me ijamãr nare, ne pê me hacjên xà kam me ijaxà, pê ca neekam me ito amji japackre ne me ipupun nare” hane.

44 — Mã mehkên catêjê te mehcukij to: “Pahhi, jũ caxuw wa ite me amã prãm na me apupun, ne amã kôr me, acahkrit me, apê akà nare me, axà me, me hacjên xà kam ite me apupun, ne nee ite me atehcajpar nare?” hajÿr.

45 — Mã Pahhiti me cumã: “Ampeaj kam wa ha me amã awjarẽ, ca hãn ne mehkryjre atajê

tehcajparprãm nare, ne me hicu ita kam, nee ate me itehcajpar nare, ne hanea ne ate me ijicu, ne me icaca” hane.

⁴⁶ — Hŏhŏ, pom mehkên te me hajÿrjê, quê hama mehkên mã mencjêj xà ata wÿr me pra, ne curia quê ha amji pupun to kêanre to mehcuhhê rohnÿtti mã. Quêha hanea ne, mempejti atajê ma mencaca xà impejti tÿrrohnÿtti mã xà ata wÿr me pra — hane.

(Pê Matew harên to hane. Pê Ruc hipêr harên kam to incrà to hane he.)

Pê Jeju amcro cunea kam ajco me cumã ampo tohahkrea to pyt, Pahpãm to me amji kam hapac xà jÿrkwa kam. Ne ahna caxwa, pê ma krÿ pê hapôj, Pÿxô jŏ kên wÿr, ne curia hân ne amji to apê. Pê cŏjkwa caprêc kôt ajco me hàhtôa ne maPahpãm to me amji kam hapac xà jÿrkwa wÿr me pra, cute me Jeju kam hapac prãmte.

27

Pê Juta amji cura

Matew 27.3-10

³ Pê Juta Carijot xwÿ ata te Jeju curê xwÿncatêjê mã hahkre. Mã cute ihkên mã me mên. Mã cute nee me curê xwÿn pê amjipytâr nare na hahkre pej, me ajkaam amji mã:

— An! Wa ite to ihcupan crire nare! Ne ite ijŏ Pahhiti kên mã mên. Ne quê ha ihtÿj xãmte mehcura! Wa ha tē ne intête mehcahpêrta — hajÿr. Ne cute ihpore hy te trÿnta atajê pyr, ne ma hacpÿ mã Pahpãm to amji kam me hapac xà

jŭrkwa wŷr, cute Pahpām mā mehcajrĕn catĕjĕ jŏ pahhi me, prohti kam wŷr to tĕ.

⁴ Ne curi to cator ne me cumā:

— Pom ite me amā ihpore hy te trĭnta na ijŏ Pahhi kĕn nare ata jŏr ita. Nāmhā he, mĭ! Hapŷā mā me apy! Imā ihkĭn nare. Wa ite to cupan. Ampo na? He neehŭmre ita kĕn nare, ne impejti cakrŏ, wa ite me amā hŏr xā ita kŏt ca ha xāmte mehcura — hajŷr. Mā me cumā:

— Wa nee ita na me ato amji japackre prām nare, atea ca amji mā ita ton — hane. Ne nee me cumā hacpŷ mā me ihpore pyr prām nare.

⁵ Mā Juta te Pahpām to me amji kam hapac xā jŭrkwa kam ihpore hy ata to me cumā hŭcapĕr, ne ma tĕ. Ne jŭ ita ri cute amji jŏkre kwŷr ne ihtyc.

⁶ Mā cute mehporĕ ata to cuprŏn ne me ajpĕn mā:

— Ihpore ita te ri jŭm tyc xā ata japrŏr, na ri cupĕ me caprŏ jŏ pore. Na ri Mojxe xwŷ te me pajapackre xā kam, Pahpām jŭrkwa kam pahte meihpore ita to me pajāhhuc xā na ihkaj na — hajŷr.

⁷ Cwŷrjapĕ ri cute ihpore ata na me ajpĕn par, ne cute me to carĕc te pot ton catĕ ata pĕ, hŏ pjĕ atajaprŏr, mehcahkrit jarĕt xā caxuw. Ne cute mehcahkrit jarĕt xā na me ton.

⁸ Cwŷrjapĕ ri ita kam cormā cute me pjĕ ata mā haprŷ to: “Me caprŏ jŏ pjĕ” hane.

⁹⁻¹⁰ Ne pĕ ramā rŷ pĕa mā Jeremij xwŷ pĕ Pahpām jarkwa to ihcakŏc catĕjĕ nŏata Pahpām jarkwa na hŏ kàhhôc kam, ita na ihhŏc to hane he:

“Mã Juta catêjête me hõ pahhi kên mã me mên
jahpan xà na,
mehpore hy te trĩnta jõr na me ajpẽn par,
ata ri hacpỹa ne cute me ipyr,
ne me to pjê te pot ton catê pê hõ pjê japrõr”
hane.

Mã ahnaa cute hajỹr.

Pê Pirat mã hĩxi cupê Jeju cawpa

Matew 27.19

¹⁹ Ne cormã Pirat pahhi krĩ xà kam jỹ ne apu
Jeju cukij, me ajkaam mã hĩxi te harkwa kujahêc
ne cumã:

— Ca ha nee hũmre pejti te jũ caxuw ampo
kên ton nare ata to kên nare. Ampo na? He
caxwa ri ite hũtir kêanre — hajỹr.

Pê pĩ na me Jeju xõr na harkwa

Matew 27.24-31

²⁴ Mã Pirat te nee me cupê Jeju mã hikran nare
na amji jahkre pej. Mã ame hàhkrihkrit catia
kam, me hàhtõti atajê ihtỹj me pahhi jũhhyr
prãm. Mã pahhi ata te nee Jeju curan na me
cumã hũjahkre nare na amji jarẽn xà caxuw, cô
na hàhwýr, ne kam hũhkra cuhhõn, mehcunea
kam mare mã. Ne hũhkra cuhhõn kwýa kam
cute me cumã:

— Wa nee ite hũmre ita curan na me amên
nare, ne me atea ri mehcuran xà — hajỹr.

²⁵ Ne mehcunea te caràr to:

— Me imã, ite mehcuran jahpan xà na, ihtỹj
me ikam me ikên pým, ne hanea ne me itàmwxwý
kam ihpým na to prãm — hajỹr.

²⁶ Mă Pirat pê pahhi ata te me cumă Parapa mă hikran. Ne cute pryti kà to Jeju cahhyr na me mën, ne pea cute krăhtare mă me hõr, măr quē mehcahhy catia, ne pī na me cuxô ne mehcura.

²⁷ Mă ma krăhtare atajê me to ihhimpej catê pê Pirat ata jŭrkwa wÿr Jeju to me mō, ne curia cute krăhtare cunea to cuprõn, mă cute mehkră tu ne to xa.

²⁸ Ne cute me cupê ihkà to pōj, ne me ahna pahhi kà tepti japjêhti ata mën, ne me cumă to ihkà.

²⁹ Ne hõmjī to me pahhi krăhkà ne ihkră mă me haxàr. Ne awpôc rŭm hŭhkra mă pī nō to pahhi jō kô ne me haxàr. Mă curia me cuna mă to xa. Ne me to hapactu xà kêanre ata kam me to incrà, ne cuna mă mehkõn kră na mehkrī ne me cumă:

— Apê Juta catêjê jō pahhi catia ne apej! — hane.

³⁰ Ne kam me harcô rē, ne hŭhkra kam me cupê pī ata to pōj, ne ihkră kam me to ihcahhy.

³¹ Ne cute me to hapactu xà kêanre ata jirô pê intête me cupê pahhi kà tepti ata caxàr, ne hacpÿa mă ihkàa to me cumă ihkà. Ne ma pī na cute menxôr ne mehcuran xà ata wÿr me to mō.

Jeju tyc xà wÿr awcapàtkô

Matew 27.45-46

⁴⁵ Mă ramă pyt me pahkră jimoac kam hÿr xàa kam, cute hàhcujro to hicu, ne ampeaj kam awcapàtkô, neawcapàtkô ita na pyt pipkjêr.

⁴⁶ Ne pyt pec pejti kam Jeju kÿjti pēa mă caràr ne:

— Inxŭ Cati, Inxŭ Cati! Ampo na mă ahte ate irer to hajÿr? — hane.

*Pê krĩ jamãr catêjê Jeju kre jamã**Matew 27.62-66*

⁶² Ne ramã Juta catêjê kôt xà jõ amcro ata cator. Ne Pahpãm mã mehcajrën catêjê jõ pahhi kwỳ me, Parixêw catêjê me, Pirat pê pahhi me, cute me ajpën par.

⁶³ Ne me cumã harkwa to:

— Me ijõ pahhiti, wa ite cormã me Jeju xwỳ hêj xi xà ata to me amji japackre, nãmri cute amji jarën to: “Quê ha ina amcro incrê, wa ha hacpỹa mã itĩr” hajỹr.

⁶⁴ Ne cu ha pahtỳj me harêt xà ata jamãr to impeaj ne, quê ha xa ahna amcro incrê, cu ha cormã me hamãr jicu. Nãmri cu ha me ita ton nare, quê ihhêaj to ihkôt me ipa catêjê me hĩ to ahkĩ, ne me harën to: “Hacpỹa mã ihtĩr!” hane. Quê ha mehhêj xi xà ita, mam ita jirôa pê ihkêanre ne — hajỹr.

⁶⁵ Mã Pirat te me cumã harkwa to:

— Nãmhã ijõ krãhtare catêjê amehcuhhê he. Ca ha me haprô, ne me to mõi, ne cute me harêt xà ata jamãr na me amẽ, quê me hamãr to mempeaj ne — hajỹr.

⁶⁶ Mã ma cute me haprô, ne me to pra. Ne cute me kën kre kam me harêt xà ata jarkwa na, me ihtô xà to me ihtô, jũm te aracri ihcaxun cupate. Ne curia ame ahname ipa, ne ame hamãr to ame ipa, ne ma mehcuhhê ne me hõmpu, ne me hamã.

28*Krãhtare ame cumã hêj xi jarën na ajpën pa**Matew 28.11-15*

¹¹ Ne cormã pyjê krĩ wÿr pry kôt me mõi kwÿa kam, mã krãhtare te Jeju kre jamãr atajê kwÿ te Juta catêjê jõ pahhi kwÿ atajê mã Jejukre te jũ mãn xà atajê cunea na harên par.

¹² Jirô pê mã ri cute jũ mã me ton xà ata na ahna me ajpên par, ne me krãhtare kwÿ mã ihpore catia ne hõi, ne me cumã:

¹³ — Ca ha me gãjarên to ame apa to me hane he: “Wa me ijikwa ne me gãr, mã Jeju kôt me ipa catêjê cator, ne ma cute me hĩ to hàhkĩj ne me to tẽ” hane.

¹⁴ — Quê ha me pajõ pjê jõ pahhiti ita kampa, ne ajteare mã ampo to kam amji kampa, wa ha me cumã ate me harên xà itajêa na harê. Hamrequê ha cute, me ite me to amji kam me ijapac xà ita na to amji kampa, quê ha nee me amã ihkên xà nõ cator nare — hajÿr.

¹⁵ Mã pea Jeju kre jamãr catêjê atajê te me ihpore ita pyr, ne ihtÿj ame cumã mehhêj xi xà na cute me ajpên par atajê jarên to meipa. Mã mehhêj xi xà atajê Juta jõ pjê cunea kôt ihcakũm. Ne cormã ita kam mehhêj xi xà ita ipa.

*Pê Jeju pjê cunea kôt ihkôt me ipa catêjê kujate
Matew 28.16-20*

¹⁶ Mã Jeju kôt me ipa catêjê te me õxi atajê, ma, por pê Jeju Hĩpôjajo jõ kên to me cumã ihcakôc ata wÿr me mõi. Mã curia Jeju te me cumã amji to ipipê.

¹⁷ Mã cute me hõmpun ne cuna mã mehcunea pÿpÿm, ne Jeju to cute me cati prãmte me to

ihcakôc pejti. Mã cormã mehkwỹ me amji mã:
“XàJejua mōrmō ajkĩ?” hane.

¹⁸ Mã ma Jeju me hÿrmã mō, ne me cumã:

— Inxũ te imã pjê me cōjkwa kam ampo cunea
to ite ihmpej xà caxuw imã carôt jōr, ne ahna
imã harkwa.

¹⁹ Cwÿrjapê ca ha pjê cunea kam mehkrĩ atajê
wÿr me pra, ne catyt kam ijarkwa kôt me ipa
catêjê na me to, quê catyt kam ikôt me ipa. Caħa
Inxũ me, Carō Pejti me, ipê ihkra japyr̃ na cō kam
mehcumrã.

²⁰ Ne ite me amã ampo cunea to ihmpej atajê
to me cumã hahkre, mār quê catyt kam ihcunea
kam me hapac to me ipa. Ne wa ha itÿj amcro
cuneakam me acahê na ipa, quê ha ahnaa ampo
cunea jamre xà kam hàhhuc na, ca me to amji
japackrea ne — hane.

PAHPÃM JARKWA CUPAHTI JÕ KÀHHÔC
Canela: PAHPÃM JARKWA CUPAHTI JÕ KÀHHÔC
(Portions)

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 1 Oct 2024 from source files
dated 29 Jan 2022

09d4e460-c38b-52b7-81c1-8300bfeb466a